

摘藻堂四庫全書薈要

史部

欽定四庫全書薈要

史部
通志卷
一至
三上

詳校官員外郎
臣楊世綸

欽定四庫全書薈要卷八千八百九十五

史部

通志卷一

宋 右 廸 功 郎 鄭 樵 漁 仲 撰

三皇紀第一

太昊 炎帝 黃帝

臣謹按三皇伏羲但稱氏神農始稱帝堯舜始稱國
自上古至夏商皆稱名至周始稱謚而稱氏者三皇

以來未嘗廢也年代則稱紀

自開闢至獲麟凡二百七十六萬歲分為十紀

厥初生民穴居野處聖人教之結巢以避蟲豸之害而食草木之實故號有巢氏亦曰大巢氏亦謂之始君言君臣之道於是乎始也有天下百餘代民知巢居未知熟食燧人氏出焉觀星辰而察五木知空有火麗木則明故鑽木取火教民以烹飪之利號燧人氏以夫燧者火之所生也時無文字未有甲歷紀年始作結繩之政而立傳教之臺始為日中之市而興交易之道亦謂之遂皇或言遂皇持斗機運轉之法

以施政教此亦欽若昊天以授民時之義也三皇者
天皇地皇人皇是也其說不經無所取證當取伏羲
為天皇神農為人皇黃帝為地皇之說為正

其說出
三皇太

古書然太昊以明天事故曰太昊炎帝以明民事
故曰神農黃帝以明地事故曰黃帝此理甚明

伏

羲作連山神農作歸藏黃帝作坤乾易之始自伏羲
三易之本自三皇夏人因連山而作連山商人因歸
藏而作歸藏周人因坤乾而作周易八卦具而六十
四卦成世言伏羲畫卦文王重之皆沿襲之言也傳

曰法始乎伏羲言圖象書契於此乎始三皇五帝三王之事蓋已久矣臣之所志在於傳信其有傳疑者則降而書之以備記載云

太昊伏羲氏亦曰庖犧氏亦曰皇雄氏亦曰天皇伏亦作處犧亦作戲亦作羲或言象日月之明故曰太昊伏制犧牛故曰伏犧因取犧牲以充庖厨故號庖犧然去古已遠古人名號難以今義求也伏犧者燧人氏之子母曰華胥履大人之迹於雷澤而孕因風而生故為風

姓伏羲生於成紀作都于陳故陳為太昊之墟樂曰立
基或云扶來繼天而王為百王先人生之始也與禽獸
無異知有母而不知有父知有愛而不知有禮卧則喏
喏起則盱盱飢則求食飽則棄餘茹毛飲血而衣皮革
伏羲德合上下天應以鳥獸文章地應以河圖洛書仰
則觀象於天府則觀法於地中則觀萬物之宜始作書
契以代結繩之政始畫八卦卦有二爻重而為六十四
名曰連山象法乾坤以正君臣父子夫婦之義始作罔

罟以佃以漁以贍民用制嫁娶以儷皮為禮作二十五
絃之瑟服牛乘馬冶金成器本陽氣之始而為律法本
五材之用而定五行因龍馬負圖而出于河之瑞故官
以龍紀而為龍師乃命子襄為飛龍氏造六書一曰象
形二曰指事三曰會意四曰轉注五曰諧聲六曰假借
使天下義理必歸文字天下文字必由六書命子英為
潛龍氏造甲歷起於甲寅日月歲時自此而生又命五
官春官為青龍夏官為赤龍秋官為白龍冬官為黑龍

中官為黃龍乃升傳教之臺而以甲歷示民命粟陸為
水龍氏繁滋草木疏導泉源毋怠於時命混沌為降龍
氏驅除民害民安則安民危則危毋怠於民命天庭氏
主屋廬為民居處命陰康氏主水土為民田里於是共
工為上相柏皇為下相朱襄吳英常居左右朱襄即子
襄吳英即子英也粟陸居北赫胥居南昆連居西葛天
居東陰康居下分九州之牧而天下化洽在位百十六
年左氏曰任宿須句顓臾風姓也實司太昊與有濟之

祀四國伏羲之後歷夏商至周不泯所謂盛德必百世祀者

臣謹按言伏羲氏者為以木德王天下帝出乎震之義伏羲氏没女媧氏作是為女皇春秋世譜云華胥生男子為伏羲女子為女媧故世言女媧伏羲之妹風姓人首蛇身乘伏羲制度作笙簧張雲幕枚占神明能變化萬物徃古之時四極廢九州裂天不兼覆地不周載火熾炎而不滅水浩洋而不息猛獸食精

民鷲鳥攫老弱女媧鍊五色石以補蒼天斷鼇足以
立四極殺黑龍以濟冀川積蘆灰以止滌水天不足
西北故日月移焉地不足東南故百川注焉蒼天神
四極正滌水涸冀川平狡蟲死精民生女媧之後有
大庭氏有拍皇氏有中央氏有栗陸氏有驪連氏有
赫胥氏有尊盧氏有混沌氏有昊英氏有朱襄氏有
葛天氏有陰康氏有無懷氏據女媧氏天子也自大
庭之後十三氏皆臣於伏羲諸家以為天子臣每

疑此在伏羲時為諸侯如夏商周在唐虞之世是也
不然當伏羲之世分九州而理天下各君一方以効
其治後世之訛以為相繼為天子也或言朱襄之時
多風而陽氣蓄積萬物解散果實不實士達作五絃
瑟以來陰氣以定羣生葛天之時民俗熙熙其作樂
也三人摻牛尾投足以歌八闋一曰載民二曰元鳥
三曰遂草木四曰奮五穀五曰謹天常六曰達帝功七
曰依地德八曰總萬物之極或言自伏羲至無懷千

二百六十年自女媧至無懷凡十五君襲庖羲之號

千一百五十年

或云自伏羲至無懷五萬七千七百八十二年自女媧至無懷一萬七千

七百八

十七年

臣又按太史公作五帝紀擇其雅言而書臣今紀採諸家之言而以雅馴者為經其不典之言則列於篇後以備記載非傳信也其誕而野如盤古者則亦不書

炎帝神農氏起於烈山亦曰烈山氏亦曰連山氏亦曰

伊耆氏亦曰大庭氏亦曰魁隗氏亦曰人皇少典之元子其母曰女登有蟠氏之女也女登有神龍之感而生神農焉長於姜水故為姜姓以火德王天下故為炎帝民不粒食未知耕稼於是因天時相地宜始作耒耜教民藝五穀故謂之神農民有疾病未知藥石乃味草木之滋察寒溫之性而知君臣佐使之義皆口嘗而身試之一日之間而遇七十毒或云神農嘗百藥之時一日百死百生其所得三百六十物以應周天之數後世承

傳為書謂之神農本草又作方書以救時疾復演八卦而為六十四卦名之曰歸藏作都于陳後徙魯以火紀官春官為大火夏官為鶉火秋官為西火冬官為北火中官為中火樂曰下謀或曰扶持其俗撲重端慤不忿爭而財足無制令而民從威厲而不殺法省而不煩列廛於國中為市始作五絃削桐為琴糾絲為絃以通天地之德以合神人之和郊特牲曰伊耆氏始作蜡明堂位曰土鼓篔簹箎伊耆氏之樂也夙沙氏為諸侯

不用命箕文諫而殺之神農退而修德夙沙之民自攻其君而來歸南交趾北幽都東暘谷西三危是其封域也在位百二十年

或云百四十年

臣謹按炎帝之女溺死東海化為精衛每銜西山木石以填東海無雄偶海燕而生今東海畔有衛誓水以精衛溺於此川故誓不飲此水一名鳥誓一名窻禽一名志鳥俗呼帝女雀又按神農人身牛首納葬水氏之女曰聽訖生臨魁嗣神農曰帝臨魁在位八

十年

或云六十年

帝承嗣位六十年

或云六年一本承在臨魁前

帝明

嗣位四十九年帝直嗣位四十五年帝釐嗣位四十

八年帝哀嗣位四十三年帝榆罔嗣位五十五年諸

侯相侵帝不能正黃帝征之天下尊為天子炎帝遂

絕自神農至榆罔五百年自臨魁至榆罔凡七帝襲

神農之號三百八十年

呂氏春秋曰神農有天下七世宋均曰女媧至神農七十

二姓譙周曰伏羲次有三姓至女媧女媧五十姓至神農神農相承八代共五百二十年

黃帝軒轅氏亦曰地皇亦曰有熊氏亦曰帝鴻氏亦曰

歸藏氏或言有土德之瑞故曰黃帝有軒冕之服故曰

軒轅作都于有熊故曰有熊少典娶于有嶠氏孕二十

四月而生帝于壽丘本姓公孫以長于姬水故改姓姬

帝生而神靈弱而能言年逾十五聰明無不徇通神農

氏世衰諸侯相侵暴帝乃習用干戈以征不享諸侯咸

來賓從於是修德振兵治五氣甄五種撫萬民度四方

教熊羆貔貅驅虎與炎帝戰於阪泉之野三戰然後得

志蚩尤為亂獨伯天下莫與之爭衡帝乃徵師諸侯以

中黃直為將與戰於涿鹿之野遂禽蚩尤戮於中冀名
其地曰絕轡之野或云榆罔之時有庶人曰蚩尤逐榆
罔榆罔與軒轅殺蚩尤于中冀軒轅復與榆罔五戰于
阪泉為軒轅所滅諸侯咸尊之代神農氏為天子是為
黃帝始制法度正名百物萬世不能易也為營陣之法
設五旗五麾有不率化者從而征之凡五十二戰而天
下服披山通道未嘗寧居東至于海登丸山及岱宗西
至于空桐登雞頭南至于江登熊湘北逐葷粥合符釜

山而邑于涿鹿之阿遷徙往來無常處以師兵為營衛
受命之日有景雲之瑞故官以雲紀師以雲命春官為
青雲夏官為緡雲秋官為白雲冬官為黑雲中官為黃
雲置左右大監監于萬國萬國和而鬼神山川封禪與
為多焉獲寶鼎神策是歲己酉朔旦冬至得天之紀迎
日推策終而復始演八卦為六十四卦名之曰坤乾常
受河圖見日月星辰之象始有星官之書察五運六氣
乃著岐伯之問是為內經或言內經後人所作而本於

黃帝舉風后力牧泰山稽常先大鴻以治民封鉅鬼臯
區皆臣佐也或云黃帝得六相而天地治神明至風后
明乎天道故為當時太常察乎地利故為稟者奢龍辨
乎東方故為土師祝融辨乎南方故為司徒大封辨乎
西方故為司馬后土辨乎北方故為理官又造書契調
鍾律紀歷數命蒼頡為史官制文字大撓為帝師作甲
子容成造歷隸首作數伶倫制十二律自大夏之西阮
隃之陰取竹於嶰谿之谷其竅厚鈞者斷兩節間而吹

之長三寸九分以為黃鍾之宮制十二筒聽鳳凰之鳴而別十二律其雄鳴六雌鳴亦六叶黃鍾之宮是生六律六呂候氣之應以正五聲實厯數權衡度量所由生也又命榮援與伶倫鑄十二鍾以和五音仲春之月辰在乙卯日在奎始奏之命曰咸池亦曰大咸始制衣服作冕旒充纁玄衣黃裳折翬翟之華漬草木之英變為五色文章而著於器服以表貴賤服牛乘馬作舟車以通道上棟下宇作宮室以居安重門擊柝以待暴客作

杵臼以利用作弧矢以振威旁行海內方制萬里畫野
分州得百里之國萬區以分星次經土設井以塞爭端
立步制畝以均不足使八家為井井開四道而分八宅
同井而飲存亡更守男女交姻有無相貸疾病相扶風
俗可同生產可一性情可親井一為隣隣三為朋朋三
為里里五為邑邑十為都都十為師師十為州分於井
而計於州則地著而數詳民不習偽官不懷私城郭不
閉見利不爭風雨時若五穀豐登人無夭枉物無疵厲

鷲鳥不妄搏猛獸不妄噬裔夷之人罔不來享有草木
于庭佞人入則指之名曰屈軼鳳凰巢于阿閣麒麟游
于苑囿帝二十五子為二十五宗其四母之子得姓者
十四人別為十二姓姬酉祁已滕箴任荀僖媯儂依二
人為姬二子為已帝娶西陵之女曰嫫祖亦曰女節生
二子其後皆有天下一曰玄囂是為青陽降居江水為
帝少昊二曰昌意降居若水為諸侯昌意娶蜀山女曰
昌僕亦曰女極生高陽為帝顓頊黃帝崩在橋山在位

百年年百十歲

或云在位百十年年三百歲子孫相承共一千五百二十年皇覽曰橋山在上

郡今綏州也

臣謹按晉語黃帝之子二十五宗其得姓者十四人為十二姓姬酉祁己滕箴任荀僖姁僂依是也二人為姬二人為己自神農至榆罔凡七世襲炎帝之號皆神農之裔也黃帝在位百年五帝三王皆黃帝之裔也據晉語少典娶于有蟜氏生黃帝炎帝然炎帝至榆罔更八世五百年何由有同父兄弟故知國語

之言不可盡信先儒本之今不遽易也臣又按方士之言曰黃帝採首山之銅鑄鼎於荆山之下鼎既成有龍垂胡髯下迎黃帝帝上騎羣臣後宮從上者七十餘人龍乃升天餘小臣不得上悉持龍髯髯拔墮黃帝之弓百姓仰號乃抱其弓與胡髯而號故後世名其地曰鼎湖弓曰烏號又曰黃帝迎日推策後率二十歲復朔旦冬至凡二十推三百八十年黃帝仙登於天又按外紀黃帝與蚩尤戰於涿鹿之野蚩

尤為大霧軍士昏迷軒轅作指南車以示四方山海
大荒北經曰蚩尤伐黃帝帝命應龍攻於冀州之野
應龍蓄水蚩尤請風伯雨師作大風雨黃帝下天女
曰魃止雨河圖曰蚩尤兄弟八十一人並獸身人語
食沙石作兵仗刀戟大弩威振天下誅殺無度天授
軒轅神符伏蚩尤蚩尤沒後亂未定軒轅畫蚩尤象
以威海內管仲曰葛盧山交而出水金從之出蚩
尤受之以作劍戟任昉述異記蚩尤兄弟七十二人

銅頭鐵額食鐵石能作雲霧軒轅誅之於涿鹿今冀州也有蚩尤神俗云人身牛蹄四目六手冀州人掘地得髑髏如銅鐵者卽蚩尤骨齒長二寸堅不可碎秦漢間說蚩尤者耳鬚如劍戟頭有角與軒轅鬪以角抵人人不能向今冀州有樂名蚩尤戲其民三三兩兩頭戴牛角而相觝漢造角觝戲蓋其遺制也皇覽曰蚩尤冢在東平壽張闕鄉高七尺居民常以十月祠之有赤氣如匹絳而出鄉人呼為蚩尤旗又按

崔實月令曰祖者道祭也黃帝之子好遠遊死為道
路神故後人出行有祖餞之事述異記蒼頡墓在北
海俗呼為藏書室有碑文周時莫識遂藏故府逮秦
時李斯始識八字云上天作命皇辟迭王漢叔孫通
識十二字又云南海中有軒轅丘鸞自歌鳳自舞古
云天帝樂也

臣又按伏羲有河圖之應矣而黃帝復受河圖伏羲
命子襄作六書矣而黃帝復命蒼頡制文字伏羲已

造律歷矣而黃帝復有律歷之作伏羲作易矣而神農黃帝復作易學者不能無疑於古帝王受命之符皆有其應所以伏羲黃帝各受河圖者也古者書契未一用字亦希故隨時而作務在應用所以周有史籀秦有李斯皆一時制字之人也乃若律歷之所更易象之所作亦在適時所以三代之前律歷不同而易亦異

右天皇自伏羲至無懷十五世千二百六十年

人皇自神農至榆罔八世五百年地皇黃帝一
世百年三皇凡二十四世共千八百六十年

通志卷一

欽定四庫全書薈要卷八千八百九十六

史部

通志卷二

宋 右迪功郎鄭樵漁仲撰

五帝紀第二

帝少昊 帝顓頊 帝嚳 帝堯 帝舜

帝少昊青陽氏即玄囂也亦謂之摯或言名摯以金德
王天下亦謂之金天氏邑於窮桑帝初為己姓之祖後
改為嬴作都於曲阜樂曰九淵用度量制樂器有鳳鳥

之瑞故以鳥紀官為鳥師而鳥名鳳鳥氏歷正也玄鳥氏司分者也伯趙氏司至者也青鳥氏司啓者也丹鳥氏司閉者也祝鳩氏司徒也鷓鳩氏司馬也鳴鳩氏司空也爽鳩氏司寇也鶡鳩氏司事也五鳩鳩氏者也五雉為五工正九扈為九農正官修其方而天下理帝有四子重該修熙重為木正曰句芒該為金正曰蓐收修熙相代為水正曰玄冥又有金天氏之裔子曰昧為玄冥師有共工氏之子為土正曰句龍有高陽氏之孫黎

為高辛氏之火正曰祝融是為五官皆在高陽高辛之
世少昊在位八十四年年百歲

或云在位百年命歷序
曰少昊傳八世五百年

或云十世
四百年葬雲陽

臣謹按昊亦作皞以能修太昊之法故曰少昊或言
明象日月故曰少昊然昊者天之昭著也太昊少昊
皆明於天事者諸家記載並存少昊惟司馬遷失紀
謂黃帝崩高陽立且有君如少昊詎可不書况與高
陽高辛堯舜之帝是為五

帝顓頊高陽氏黃帝之孫昌意之子生十歲而佐少昊
十二而冠二十即帝位受學於綠圖靜淵以有謀疏通
而知事養材以任地載時以象天依鬼神以制義治氣
以教化絜誠以祭祀樂曰五莖

或云六莖

作都于衛是為帝

丘後徙高陽故稱高陽氏尚赤薦玉以赤繒少昊之衰
也九黎亂德民神雜糅不可方物家為巫史無有要質
民匱于祀嘉生不降無物以享禍災荐臻莫盡其氣顓
帝受之乃命南正重司天以屬神北正黎司地以屬民

使復舊常無相侵瀆作歷以孟春為元是時正月朔旦
立春五星會于營室冰始泮蟄始出雞三號天曰作時
地曰作昌人曰作樂鳥獸萬物皆以和應故顓帝聖人
為歷宗也命飛龍氏作樂效八風之音名曰承雲以祭
上帝北至於幽陵南至于交趾西至于流沙東至于蟠
木

東海有山名曰度索上有大桃樹屈蟠三千里

動靜之物小大之神日月所

照莫不砥屬有子四人曰窮蟬伯鯀皐陶老童顓帝崩

葬濮陽在位七十八年年九十八歲

或云九十一歲命歷序曰顓帝傳九

世三百五十年或云
八世五百四十八年

臣謹按高陽氏以水德王天下又按容成造歷雖起
於黃帝而三統歷始自伏羲然歷法以顓帝為宗上
古之時民淳俗熙為君者惟以奉天事神為務故其
治略於人而詳於天其行事見於方冊者載在歷家
及緯書為多唐虞之後以民事為急故其治詳於人
而略於天孔子不語怪力亂神故著書斷自唐虞又
按顓帝之法婦人不避男子於路者制之四達之衢

命鯀先為樂倡鯀乃偃浸以其尾鼓其腹其音英此
皆誕言也

帝嚳高辛氏亦曰佶黃帝之曾孫也黃帝生玄囂是為
少昊玄囂生蟠極蟠極不得位而生嚳姬姓嚳問道於
栢招年十五佐高陽三十登帝位以其居於高辛故曰

高辛氏樂曰六英

或曰五英

作都于亳尚黑薦玉以黑繪命

咸黑為聲歌九韶六列六英命倕作鞀鼓鐘磬吹笙管
堦荒鳳鳥天翟來舞以光帝德命重黎為火正曰祝融

或言顓帝生稱稱生卷章卷章生重黎為嚳火正焯燿
敦大天明地德光照四海生柔嘉材故命曰祝融共工
氏作亂帝命重黎誅之而不盡帝以庚寅日誅重黎以
其弟吳回為重黎後復居火正為祝融遂平共工氏帝
生而神靈自言其名博愛利物不於其身聰以知遠明
以察微順天之義知民之急仁而威惠而信修身而天
下治取地之財而節用之撫萬民而利誨之歷日月而
迎送之明鬼神而謹事之帝執中而徧天下日月所照

風雨所至莫不服從帝有六子陳鋒氏女曰慶都孕十
四月生堯於丹陵媿些訾氏女曰常儀生摯有郤氏女曰
姜原生棄有娥氏女曰簡狄生契又有闕伯封商丘主
辰實沈封大夏主參未知其母之為誰也摯在位七十

五年年百五歲

或云六十三年年百歲又云九十八歲九十二歲

葬濮陽

命歷序曰

摯傳十世四百年

摯嗣立荒淫無度諸侯廢之推堯為天子摯

在位九年非帝之限不當五運自黃帝至摯三百四十

一年少昊至摯四世二百四十一年

命歷序曰黃帝傳十世千五百二十

年或云
十八代

臣謹按高辛氏以木德王天下又按共工氏在伏羲
之後專任知刑以水德居木火之間霸而不王亦以
水紀官周語曰共工欲壅防百川墮高堙庠以害天
下皇天弗福庶民弗佑是以滅亡賈逵曰共工諸侯
也炎帝之後姜姓高陽氏衰共工與高辛爭而王歸
藏啓筮曰共工人面蛇身朱髮淮南子曰共工之力
觸不周之山使地傾東南與高辛爭而帝遂潛於淵

又曰舜時有共工振滔洪水以薄空桑文子曰共工
水害顓帝誅之荀卿曰禹伐共工據此所言皆不足
信然共工氏當始於伏羲之後子孫承傳以至堯舜
之世皆謂之共工氏

帝堯陶唐氏曰放勳嚳之子姓伊祁身長十尺年十五
佐兄摯封唐侯二十一即帝位或言摯禪于堯高氏云
摯崩而帝放勳立堯始封于唐

今中山唐邑

後遷于晉陽及

為天子都平陽樂曰大章帝聰明文思允恭克讓其仁

如天其知如神就之如日望之如雲富而不驕貴而不
舒以尹壽為師以許由為友內則親睦九族外則辨章
百姓協和萬邦黎民於變時雍黃叔純衣彤車乘白馬
尚白薦玉以白繪茅茨不翦土階三尺樸桷不斷素題
不斲太羹不和粢食不鑿大路無文越席不純飯土簋
飲土釶夏葛衣冬鹿裘棄金玉捐文綺不視異物不寶
玩器衣履不盡敵不更為禁淫偽輕徭賦不奪民時不
爭民利置諫鼓達窮民立謗木使人書之樂聞過也巡

狩告成周流五嶽存鰥寡賑荒札一民飢則曰我飢之
一民寒則曰我寒之一民罹辜則曰我陷之故民戴之
如日月愛之如父母不賞而勸不罰而治三苗復九黎
之亂堯克之于丹水之浦以服南蠻不忘重黎之舊使
其後復典之是為羲氏和氏乃命以順天之道歷象日
月星辰分為四序以授民時羲仲居嵎夷理東作以殷
春中羲叔居南交理南訛以正夏至和仲居昧谷理西
成以殷秋中和叔居朔方理朔易以正冬至四時之氣

既正日星之躔無爽故人民之作息鳥獸之孳乳皆可得而理乃正閏餘以成歲功下逮商周重黎氏世叙天地而別其分主是時龍門未開呂梁未發河出孟門江淮通流無有平原高阜故曰洪水滔天懷山襄陵堯憂民之憂而求治水者羣臣四嶽皆舉高陽氏之子伯鯀堯封鯀為崇伯使之治水鯀乃興徒役而作九仞之城訖無成功堯有子十人散宜氏之女曰女皇生丹朱應嗣堯以年老欲異位而丹朱嚚訟不可授乃以天下授

許由許由不受乃訪諸四嶽嶽曰有鰥民曰虞舜瞽瞍之子父頑母嚚弟傲舜以孝道諧其家使不至於惡堯曰我其試哉乃妻以二女封之有虞而為諸侯歷試三年知舜之德以為授舜則天下得其利而丹朱病授丹朱則天下病而丹朱得其利堯曰終不以天下之病而利一人卒授舜陶唐氏之世俗熙民泰有老人擊壤而歌於路曰吾日出而作日入而息鑿井而飲耕田而食帝力於我何有哉故仲尼稱之曰惟天為大惟堯則之

蕩蕩乎民無能名焉巍巍乎其有成功堯生以甲申即位以甲辰召舜以甲午召舜之年堯七十一矣舜以甲寅攝政堯九十一矣以辛巳崩是避位二十八年在位九十八年凡百十八歲葬于穀林實濟陰百姓悲哀如喪父母三年四方莫舉樂舜畢三年之喪避丹朱於南河之南諸侯朝覲者不之丹朱而之舜獄訟者不之丹朱而之舜謳歌者不謳歌丹朱而謳歌舜舜曰天也而後之中國踐天子位焉

臣謹按陶唐氏以火德王天下又按陶唐之世越裳國獻神龜蓋千歲方三尺餘背有科斗文記開闢以來堯命錄之謂之龜厯又堯之庭有草生焉曰蓂莢十五之前日生一葉十五之後日落一葉小餘則一葉厭而不落觀之可以知旬朔故又名厯草景星見甘露降醴泉溢朱草生神禾敷鳳巢阿閣龍見宮沼玉藕生沼中芻花為禾烏化為白宮中一日而十瑞又按淮南子堯時十日並出堯命羿仰射之中其九

九鳥皆死墮其羽翼或言十日並出焦禾稼殺草木而民無所食獫狁鑿齒九嬰大風封豨修蛇皆為民害堯使羿誅鑿齒於疇華之野殺九嬰於凶水之上繳大風於青丘之澤上射十日下殺獫狁斷修蛇於洞庭禽封豨於桑林於是山川險夷道里遠近可得而理也又按任昉述異記堯誅鯀於羽山化為黃熊入於羽淵今會稽人祭禹廟不用熊白黃熊即黃熊也陸居曰熊水居曰能昉按今江淮中獸名能能蛇

之精冬化為雉春復為蛇今吳中不食雉毒故也
臣謹按能乃來切所以古人借為耐字其音與熊自
是相遠惟文相近所以致訛實非熊也又按如淳曰
誹謗之木即橋梁交午柱頭也應邵曰誹謗木橋梁
邊版也所以書政之愆至秦去之

帝舜有虞氏曰重華亦曰大舜亦曰都君顛頊生窮蟬
窮蟬生敬康敬康生句芒句芒生螭牛螭牛生瞽瞍瞽
瞍生舜自窮蟬至舜皆微為庶人舜重瞳龍顏大口黑

色長六尺生於姚墟故姓以姚舜之母曰握登死而瞽
瞽以繼室生象瞽瞍惑於繼室而昵象象復陰相父母
有殺舜之心舜無所恨而事父母與弟不敢怠遑年雖
五十猶作嬰兒慕親堯聞其賢聘之於草茅之中與之
語禮樂而知其道廣大不窮妻以二女以觀其內使九
男與處以觀其外舜遷于媯汭二女從之率舜之教不
敢以貴易其親戚盡婦道焉九男相與益篤舜冀州人
也耕于厯山厯山之人皆讓畔漁于雷澤雷澤之人皆

讓居陶於河濱河濱之器不苦窳作什器於壽丘就時
於負夏一年所居成聚二年成邑三年成都昔高陽氏
有才子八人天下謂之八愷高辛氏有才子八人天下
謂之八元此十六族者世濟其美不隕其名堯不能舉
舜舉八愷使主后土以揆百事莫不時序舉八元使布
五教于四方內平外成昔帝鴻氏有不才子天下謂之
渾敦少昊氏有不才子天下謂之窮竒顓頊氏有不才
子天下謂之檇杻緡雲氏有不才子天下謂之饕餮渾

敦窮竒禱杌饕餮皆惡獸也能為人害故天下之人目
為四凶堯不能去舜乃流四凶族投諸四裔以禦魑魅
舜有大功二十四方莫不仰戴堯知舜之足授天下也
使攝行天子事舜辭不獲乃以正月朔受終于文祖文
祖者堯之祖廟以明天下之重不敢以已授也舜用璿
璣玉衡以齊日月五星之政類于上帝禋于六宗望于
山川徧于羣神集五瑞五瑞者五等諸侯所執之玉也
覲四嶽羣牧然後班瑞修巡狩之禮歲二月東巡狩至

于岱宗柴望秩于山川覲東方諸侯協時月正日同律
度量衡修五禮五玉三帛二生一死贄如五瑞卒乃復
五月南巡狩八月西巡狩十一月北巡狩各於方嶽其
禮如初歸格于祖廟用特牛禮五載一巡狩諸侯四朝
敷奏以言明試以功車服以庸肇十有二州封其山望
濬其川瀆法有常典惟刑之恤伯鯨治水九載而功用
不成三苗為亂於江淮驩兜舉共工試以工師淫荒怠
事舜因巡狩歸而言於帝請流共工于幽州以變北狄

放驩兜于崇山以變南蠻遷三苗於三危以變西戎殛
鯀于羽山以變東夷四罪而天下咸服舜攝位二十八
年堯崩舜仰慕三年坐則見堯於牆食則覩堯於羹三
年喪畢而避丹朱天下不歸丹朱而歸舜然後踐天子
位即位之明年正月元日格于文祖詢四嶽闢四門明
四目達四聰四方之情無所壅蔽命十二牧所重民食
敬授民時遠至邇懷蠻夷率服舜本處虞之媯汭號曰
有虞氏作都于蒲阪尚赤其社用土封丹朱于丹淵為

諸侯以奉先祀服其服禮樂如之謂之虞賓示弗臣也
舜載天子之旗往朝瞽瞍彌奉子道封象於有庠象雖
為諸侯不得為政天子使吏治其民而納其貢賦舜廣
視聽求賢以自輔作五明扇立誹謗木恭己無為彈五
絃之琴歌南風之詩曰南風之薰兮可以解吾民之愠
兮南風之時兮可以阜吾民之財兮當堯之時禹臯陶稷
契伯夷夔龍垂益彭祖皆以舉用未有分職舜知任不
專則功不成業不世則知不周鯀雖治水無功而禹為

其子九年之間足知利害不使易業故首命禹為司空
平水土誅父用子而舜無疑心戮力勤王而禹無仇色
又命棄為后稷播百穀命契為司徒敷五教命臯陶為
士明五刑命垂作工理百工命益作虞治山澤命伯夷
作秩宗典三禮命夔典樂教胄子命龍作納言出納帝
命舜於是總命之曰各恭厥職時亮天功三載考績三
考黜陟幽明庶績咸熙乃封契於商賜姓子封棄於邵
賜姓姬封禹於夏賜姓姁禹曰非予能成大費是輔舜

嘉大費之功錫以玄玉妻以姚姓之女封之土田賜姓
嬴祚四嶽之國命以侯伯賜姓姜封於申呂即伯夷也
垂益夔龍之後不知所封夔效山林谿谷之音以歌以
麋鞞置缶而鼓之擊石拊石象上帝石磬之音以致舞
獸拌五絃之瑟為十五絃命曰大章以祭上帝或曰重
黎舉夔舜以為樂正乃命益八絃為二十三絃之瑟夔
修九韶六列六英以明帝德正六律和五聲以通八風
重黎欲益求人舜曰一夔足矣十二牧行而九州莫敢

違惟禹之功為大披九山通九澤決九河復舊制而定九州土田貢賦各効其職方五千里至於荒服天下明德自虞帝始其樂曰大韶故仲尼稱之曰韶盡美矣又盡善也君臣悅懌相和而歌曰元首明哉股肱良哉庶事康哉又相戒勅而歌曰元首叢脞哉股肱惰哉萬事墮哉于時日月光華卿雲叢聚又相和而歌卿雲帝歌曰卿雲爛兮糾縵縵兮日月光華旦復旦兮八伯稽首曰明明上天爛然星陳日月光華宏于一人帝乃再歌

曰日月有常星辰有行四時順經萬姓允誠於予論樂
配天之靈遷于賢聖莫不咸聽鼙乎鼓之軒乎舞之精
華已竭蹇裳去之有苗氏左洞庭右彭蠡大山在其南
殿山在其北負固不服禹欲伐之舜曰吾德不厚而行
武可乎乃大敷文德舞干羽于兩階七旬有苗格初舜
娶堯二女曰娥皇女英女英生商均亦不肖舜子九人
在位三十三載命禹攝行天子事禹推與臯陶不獲乃
以正月朔旦受命于神宗帥百官若帝之初舜生三十

徵庸三十在位五十載陟方乃死是為天子五十年年

百十歲司馬遷曰舜二十以孝聞三十堯舉之五十攝

行天子事五十八堯崩六十一代堯踐帝位三十九年

南巡狩崩於蒼梧之野葬於江南九疑是為零陵

或言舜葬

于紀市廛不愛其肆皇甫謐曰舜以堯之二十一年甲子生三十一年甲午召用七十九年壬午即真百歲癸卯崩蓋本史紀之言也或云舜一百五歲或云百十二歲舜豫薦禹於天十七年而

崩三年之喪畢禹亦避舜之子諸侯歸之然後踐天子

位丹朱商均皆有土世為唐虞之國以奉先祀服其服

禮樂亦如之以容禮見天子天子弗臣示不敢專也有
虞氏禘黃帝而祖顓頊郊堯而宗舜幕能帥顓頊者也

故報焉

熊安生解禮云周以黃
帝堯舜之後為三恪

臣謹按有虞氏以土德王天下又按司馬遷本孟子
之言而表裏之曰堯賜舜絺衣與琴為築倉廩與牛
羊瞽瞍尚復欲殺之使舜上塗廩瞽瞍從下縱火焚
廩舜乃以兩笠自扞而下去得不死後瞽瞍又使舜
穿井舜穿井為匿空旁出舜既入深瞽瞍與象共下

土石實井舜從匿空出去瞽瞍象喜以舜為已死象
曰本謀者象象與其父母分乃取舜妻二女與琴而
以牛羊倉廩與父母象乃止舜宮居鼓其琴舜往見
之象愕不懌曰我思舜正鬱陶舜曰然爾其庶哉舜
復事瞽瞍愛弟彌謹又按韋昭曰三苗炎帝之後諸
侯也堯舜之時誅討有罪廢絕其世不滅其國立其
近親紹其先祀所以有苗國歷代常存屢不從化隨
巢子汲冢紀年曰三苗將七天雨血夏有冰地坼及

泉青龍生於廟，日夜出，晝日不出。又按韓子曰：瞽瞍為父而舜放之，象為弟而舜殺之。觀此所言，則六經不得夫子所謂聖人者，其難為聖人矣。韋昭三苗之說有理哉。又按任昉述異記：湘水去岸三十里有相思宮，望帝臺。昔舜南巡而歿，葬於蒼梧。娥皇女英追之不及，相與慟哭，淚霑竹，竹文悉為之斑斑然。又云會稽山下有虞舜巡狩臺，臺下有望陵祠，舜南巡葬於九疑。民思之，故作是祠。又云舜都郭門古宮存焉。

宮前有堯臺舜館銘記文古不復識者按皇覽曰舜
冢在零陵營浦縣其山九谿皆相似故號九疑傳曰
舜葬蒼梧象為之耕山海經曰蒼梧山舜葬于陽丹
朱葬于陰皇甫謐曰二妃葬衡山

右五帝自少昊至舜凡五世共三百八十五年

通志卷二